

Schnitzelbank 2008

vom Güggu

Üs isch der Stefan Hügli als Polizeidirektor guet bekannt.
Jetzt het ihn sini Partei verbannt.
Drum fühlt er sich verletzt und usegschosse.
Die Rote und Grüne freuts, die Bürgerleche hei keini Träne vergosse.
Es isch so richtig zum Gränne, de niemer wot das Desaster bereue.
Der Hügli wird dänk bald für d'SVP im Tierpark Dählhölzli schwarzi Schaf betreue.

D'Widmer-Schlumpf und ou der Schmid,
chönte, we sie wette, singe es garstiges Lied.
Verräter, Meuchler, nume s'Sbrübscht zählt für die beide.
Derby si sie, so meint i's, doch sehr bescheide.
By üs, z'Bärn, a der Fasnacht, müsst dir der Chopf nid la hange.
Eveline und Sämi, mir tüe euch als sympathischi Einzelmaske empfangen.

Der Couchepin het plötzlech Sörgeli,
will er beleidig het der Mörgeli.
Worum verzapft so ne Bundesrat plötzlech Mist?
Er isch doch Magistrat und nid Journalist.

Jetzt luege mir mal ganz global,
die Banke si doch nüm normal.
Die schütte dänä änet em Teich
üses Gäld nur so ane, s'isch bireweich.
D'UBS, ganz ohne Sicherheite,
lat sich zu sötigem Deal la verleite
und stricht sech de, eieiei,
21 Milliarden as Bei.
Der armi Ospel breichts bi neme Abgang bsunders schlimm.
Är überchunnt nur e bescheidene Millionen Bonus-Gewinn,
Wes nid längt, de rat i, liebe Ospel,
vergiss s'Bankwäse, gang uf d'Gass u sing dört Gospel.

Im Sport wirsch hüt doch nur no plaget,
vo Afang a isch Leischtig gfraget.
Drum nimsch das isch wie Medizin,
wie d'Hingis halt mal Kokain.
Villicht brucht me Doping ou i der Politik?
Oder wie erklärt me sich süsch em Christoph Blocher si Kick?
Cha eine gopferdeckel us cho ohni Droge,
wo sini Kollege und die halbe Schwiz so cha plage.
Oder bringe si sech fit, ganz ohni Hohn,
wie der FC Thun mit Sex-Hormon?

YB isch ar Spitze, und Thun isch fast letscht.
Uf em Feld gäbe üsi Buebe s'Bescht.
Nach em Spiel kei Sex, scho gar nid mit junge Hüpfen.
Drum findsch bi Thun kei Pünkt, derfür jedi mängi Schlüpfen.

I bi im Wald, um mi ume isch Rue,
äs Rehli äset und es Vögeli piffet derzue.
Hie isch es so friedlech still, u das han i gärn.
Genau eso isch es ohni Blocher jetzt im Bundes-Bärn.

O Cervelat, o Cervelat, mir müesse alli gern di ha.
 S'Dilemma um e Cervelat
 isch truurig klar und riesengross.
 Me darf die alti Hut nümme bruuche.
 Was isch de da ou los?
 Ob Rind, ob Sou, ob Rot, ob Blau
 Entscheidet sich jetz gli.
 Die schöni, dünni Bruni isch scho wäg,
 die ghört em Sarkozy.

Herr Boller het e nigelnagelneue Mercedes kouft,
 dä wunderschön dür üsi Gasse louft.
 Er fährt über ne Poller,
 futsch isch dä schön Wage vom Boller.
 Wär isch schuld. Dir chöits errate,
 das sie hirnamputierte Verkehrstechnokrate.

Strasse uf, Strasse zue,
 bi all däm Lärme hesch nie di Rue.
 Löcher hie, Löcher dört,
 alles isch guet, wes nume der Verkehrsfluss stört.
 Schuld dra si. Dir chöits errate,
 di hirnamputierte Verkehrstechnokrate.

Üsi Autobahne wärde rasiert.
 Tusig Kilometer grodet u d'Flächi asphaltiert.
 Wer het das verboche, dir chöits errate:
 Das si ging di hirnamputierte Verkehrstechnokrate.

Telefonieret emal em Notruf vor Polizei, Nummer 117.
 Da tönt e fründliche Stimm und seit: „Befinden Sie sich in einer bedrohlichen
 Situation, bleiben Sie bitte am Apparat!“
 Das si, dir werdet es wohl errate:
 Villecht – wahrschinlech ou hirnamputierte -, aber sicher Polizeibürokrate.

Wo mir no schwarzi Ghüderseck hei ufs Trottoir gschmisse,
 si Stadtfüx cho u hei se verrisse.
 Die neue blaue Seck choschte viel Gälder.
 Dafür bruchts kei Füx me, die risse vo sälber.
 Wer isch da verantwortlich. Dir werdet es nid errate.
 Das si nämlich jetz die hirnamputierte Ghüdersacktechnokrate.

Wil me nümme über e Bundesplatz mit eme Auto darf röllele,
 löh die schlauere vo de hirnamputierte Verkehrstechnokrate d'Lüt uf Is la schlöfele.
 Ou der Stapi isch derby. Warum er das macht? Tüts errate!
 Der Tschäppu ghört jetz zu de Pirouetteakrobate.

U jetz hör i uf und sueche der Rank,
 z'beende mini Schnitzelbank.
 I glaube ou, i chume besser dure,
 wenn i es Jahr lang halte d'Schnure.